

Las cristallas sparidas – in «tema chaud» a Tujetsch

Trais vistas pertutgant las mineralias or dal tunnel da basa


DA CLAUDIA CADRUVI / ANR

■ **Nua èn ils cristals e las specias raras ch'ils miniers han cartaiवलमलन chattà sut Tujetsch cun furar il tunnel da basa dal Gottard? Singuls indigens han cumprà in cristal ed han survegnì chastis. Teodosi Venzin ha era survegnì problems, ma el n'è betg villà sin ils miniers.** *Placi Berther* era president communal cura che las lavurs per la Neat han cumenzà. Sco giurist sa regorda el anc bain che la confederaziun aveva laschà sclerir tgi che saja atgnamain proprietari da las mineralias che vegnan nanavant durant furar il tunnel. Berther explitgescha: Il material or dal frunt dal vau tutga a la confederaziun, damai che lezza ha dà l'incarica da chavar e damai ch'in tal tunnel custa gea fitg bler. Ils furns da la vart, pia en las parais dal tunnel, tutgan dentant a la vischnanca da Tujetsch u al chantun Uri – tut tenor sut tge territorii ch'els sa chattan.

«Il sistem n'ha mai funcziunà»

Damai che las autoritads communalas na pudevan betg sezzas sa render en il tunnel eran ellas avisadas sin ils geologs, miniers u lavurers. Tujetsch ha perquai fatg ina cunvegna cun l'AlpTransit Gottard (ATG): Ils miniers e lavurers èn vegnids infurmads che las mineralias sut il territori da vischnanca tutgian a Tujetsch. Tgi che chattia cristallas duaia mussar quellas e la vischnanca cumpria lura giu intgins bels chats per in pretsch da fiera. Il rest possian ils lavurers salvar.

«La vischnanca avess vuli intgins bels



In cristal sco memoria al tunnel da basa, quai ha Teodosi Venzin adina vuli posseder.

FOTO C. CADRUVI

exponats», explitgescha Berther. «Ma propi funcziunà n'ha quest sistem mai, almain betg uscheditg sco jau sun stà president.» L'ATG haja bain infurmà ses lavurers, ma l'interpresa aveva autras prioritads. «Cristallas eran per l'interpresa bagatellas che disturban mo», suppona Berther. Tujetsch haja vuli cuntanscher ina basa da confidenza cun ils miniers. Ma lezs hajan probabel temì che la vischnanca gaja cun las cristallas senza pagar. Pli tard ha Tujetsch lura installà ina survigilanza.

«In tema chaud»

«In che chapescha insatge da crappa ed ha in zichel in'idea da geologia sto savair ch'i vegn nanavant cristals sch'ins chava en direcziun dal territori da Nalps», di il chavacrappa *Toni Schmid* da Camischolas. A Tujetsch hajan ins da bell'entschatta sutschazegià il tema. «Ins ha reagì pir cura ch'ils utschels chantavan giu da mintga pign ch'i vegnia nanavant cristallas. Lura han ins sajettà cun chanuns.» Dentant eran las cristallas davent.

Ord la retrospectiva di Schmid che la vischnanca avessia stuì engaschar gia da bell'entschatta ina survigilanza che avess bajegià si in bun contact cun ils miniers. L'ATG haja interprendì pauc u nagut. Il museum da Tujetsch possedia oz bain ina pulita collecziun da cristallas, ma la bella tocca derivia dal territori d'Uri. «Cumpareglia cun quai ch'è vegnì ora sut Tujetsch di jau sinceramain che quai che nus avain survegnì è minim.»

Fin uss n'ha Schmid anc betg vesì cristals tuatschins or dal tunnel sin ina fiera

da mineralias. El suppona dentant che questa tocca vegnia schon anc en vendita cun il temp – forsà betg gist en Svizra. En mintga cas saja quai in «tema chaud» en Tujetsch.

«Ina memoria da nossa istorgia»

Singuls indigens en la Cadi che han cumprà in cristal or dal vau sut Tujetsch han survegnì in chastis. *Teodosi Venzin*, che ha acquistà avant sis onns in mulau a la bursa da mineralias a Minca, ha perfin survegnì problems cun la procura publica da l'Uri. *Lezza* ha confiscà ses mulau il mars passà. *Uss* ha la dretgira d'Uri decidì che la procura stoppia dar enavos il cristal (guarda LQ dad ier).

Malgrà las malempernaivladads che Venzin ha stuì far atras cun las autoritads uranaisas n'ha el nagin hip sin ils miniers ch'èn mitschads senza chastis. «Perclertg» hajan els prendì las cristallas or dals furns en las parais, uschiglio fissan questas custavladads per adina stadas suteradas en il culm u davos il betun.

Venzin regorda als onns tschuncanta e sessanta ch'ins ha furà las stollas d'aua per l'Ovra Rain Anterior. Da lez temp na s'interessavian ins betg per mineralias. Las cristallas vegnevian messas ensemen cun tschel material sin la deponia. «Nagin aveva insatge da quai.» Cumpareglia cun lez temp hajan tscherts miniers en il tunnel da basa perclertg chapì dapli e prendì las custavladads or dals furns. Las mineralias saja derasadas en l'entira Svizra ed en l'exteriur, suppona Venzin. «Jau hai adina giù interess da survegnir in bel crap or dal vau sin noss territorii. Per mai èsi ina memoria da nossa istorgia.»